

Dapi 125 onns datti la Viafier retica

La Terra Grischuna deditgescha in numer a la giubilara

■ **(anr/gc) La segunda edizun da la Terra Grischuna da quest onn stat en l'ensaina da 125 onns Viafier retica. Ella fa quai cun ina retscha da variadas contribuziuns illustradas sut il motto «125 onns Viafier retica – cotschna – e movibla». Suandantamain be insaquant sguards.** Entschavì hai ils 9 d'october 1889 cu l'emprim tren è cursà da Landquart a Tavau. Quel mument è vegnì mess il fundament per la rait da 400 km Viafier retica. En la retrospectiva pon ins constatar gronds success per la viafier grischuna. Sia finamira resta da correspunder vinavant als giavischs da la clientella, augmentar la rendita, mantegnair punts, tunnels e galarias sin 77 km, pudair porscher novs products ed uschia creschentar la dumonda.

Sche planisaders da viafier han siemis sa midan quels en atschal e betun u – quai che succeda anc pli savens – en nagut. L'emprim che ha pudì realisar ses plan è stà l'Ollandais Jan Halsboer cun la lingia viafierila tranter Landquart e Tavau. Mo la prolungaziun da quella cun la lingia viafierila tras la Scaletta en Engiadina è dentant restada in siemi. Giavischs e visiuns datti en quest grà vinavant – sco per sumeglia ina lingia viafierila da l'Engiadina or en il Vnuost, da Scuol fin a Landeck ed era da pudair cuntanscher pli spert tshertas destinaziuns cun la viafier en e dal Grischun.

Impressunanta è la reportascha da-

vart la construcziun dal tunnel da l'Alvra tranter 1898–1903. Pli che 1300 lavurers eran occupads 1902 cun la perfuraziun. Ils blers dad els eran Talians e vivevan en abitadis temporars a Preda e Spinna (Bever). Lur lavur era dira. En tut èn 16 umens sa disgraziads mortalmain e pli che 2000 vegnids blessads.

La viafier sin la lingia da l'Alvra vegn frequentada fitg stedi. Pli che 100 onns suenter l'avertura ha l'Unesco recepì la lingia da l'Alvra e Bernina en il register dal patrimoni cultural mundial. – En in vast biro a Landquart vegnan tut ils fils dal manaschi da la Viafier retica ensemen. 40 collavuratur è responsabels per la planisaziun e surveglianza dal traffic viafieril sin ina rait da 380 km tras telecumonds. – La Viafier retica è ina da las pli bellas ed attractivas viafiers en las muntognas. Quai ha dentant era ses pretsch: Lavinas, aua gronda e crappa fatschentan adina puspè la Viafier retica dapi 125 onns – spezialmain alur cu i dat morts tar talas disgrazias.

Preschentà vegn er il grond pionier grischun da la viafier Achilles Schucan, menziunads ils dus schenis ord la Val Bergiaglia: il renumà artist Alberto Giacometti ed il main enconuschent, ma fitg talentà fotograf Andrea Garbald. – Allegada vegn plinavant la fundaziun Pestalozzi cun mussar co ella sustegna era persunas durant il studi che derivan da chantuns muntagnards.